

Gobierno no por haci pa haci, pero mester tene cuenta cu

Parke Nacional Arikok no ta “djis un mondi”, e ta un area di conservacion

Si Aruba no mantene su mes na palabracionnan haci, lo perde saco y cangreu



SIMAN pasa a sali den algun medio di comunicacion, un publicacion di Parke Nacional Arikok riba e asunto di e entrada bieu di Shete.

Fundacion Parke Nacional Arikok (FPNA) cu ta oficialmente e instancia encarga cu maneho di e tereno completo di Parke Nacional Arikok kier a duna su puntonan di opinion riba e tema delicado aki.

Pa cuminsa tin e hecho cu pa medio di Landbesluit e fundacion a wordo otorga tur responsabilidad di maneho di e Parke. Esaki ta nifica cu tur decision mester wordo tuma dor di e fundacion pa salvaguardia e identidad di e Parke como uno di conservacion di naturalesa. Ta p’e motibo aki ya desde 1997 a wordo dicidi cu e areanan di parke lo wordo dividi den tres.

E parti central ta unda cu lo tin actividad recreativo cu cierto intensidad, mientras cu e parti noord y zuid lo bira areanan di conservacion cu minimo uso. Ta importante pa menciona aki cu Conchi ta situa den e area noord di conservacion.

FPNA ta consciente cu desde cu Natural Bridge a colapsa algun aña atras, e industria turistico a crece rond di Conchi. Hasta Aruba Tourism Authority a promove Conchi intensivamente como un “must see attraction”.

FPNA ta consciente cu sera Conchi pa vehiculonan motorisa lo no ta un opcion practico den termino corto. Esey no ta kita cu FPNA ta un fundacion cu tey pa salvaguardia e naturalesa, geologia y cultura den Parke, y cu mester tin un balance entre uso turistico y conservacion. Awor Fundacion Parke Nacional Arikok ta den un situacion dificil unda cu Gobierno a duna

orden pa drecha e caminda desde Shete pa Conchi, kibrando leyman vigente.

Parke Nacional Arikok tin un integridad pa sostene como organizacion di conservacion y tumando e decision aki, Gobierno ta pone FPNA den un situacion cu lo bira dificil di splica den comunidad internacional di conservacionistanan.

Corda cu Parke Nacional Arikok a haya un regalo di 7.1 miyon euro for di comunidad Europeo cu e intencion di haci Parke Nacional Arikok bira independiente di e subsidionan di Gobierno cu awor ta mas cu 3 miyon florin pa aña.

Pa por habri un post na Shete, e inversion inicial lo costa 400.000 florin, y cada aña e personal nobo cu lo ta necesario lo costa 250.000 florin. Esaki ta haci imposibel pa parke por bira independiente financieramente di Gobierno y lo mester keda pidi subsidio pa hopi aña mas. Esaki lo por trece consecuencia

serio pa Aruba otro biaha cu acudi na Union Europeo pa fondonan.

Es mas dor di no tene su mes na areglonan Gobierno di Aruba por haci cu Aruba ta cay riba un “black list” internacional cu ta haci dificil pa Aruba yega na fondonan internacional.

Tristo t’e hecho cu durante e trabounan conduci siman pasa un Watapana mahestuoso a wordo tumba abou den e area di Parke Nacional Arikok. Si e instancianan concerni a tene nan mes n’e palabracionnan, cosnan asina lo por a wordo evita.

FPNA ta pidi pa tene cuenta cu naturalesa. Parke Nacional Arikok no ta “djis un mondi”, e ta un area di conservacion cu ta cubri casi 18% di Aruba. Especialmente den e diano aki cu nos ta celebra e patrimonio di Aruba mester pone e accionan n’e palabranan, tabata splicacion duna pa Diego Marquez, Msc, Ecology & Education Manager di Fundacion Parke Nacional Arikok.